

1 Timóteo

¹ Natyo Paulo, Jesus Cristo niraene kakoare wiyasehareheta Enore xaokala xema, watyahitere Wiyekohase Jesus Cristo xaokala xema hoka

² naxairatya exe babera homana, Timóteo. Nityani hisaona Jesus Cristo koamaniya hisaohenere hiyeta. Maika Wexe Enore, Wiyekohase Jesus Cristo waiye moka hiso, airakoaneharetya hiso, exahe hoka himehexaikohare moka.

*Xairihalikisatinæ Xaotyakisati Metalahare
Xema Mawenatyakene Maheta*

³ Noxanihenere Macedônia koa nali xowaka naxa hiso hoka Éfeso nali hisaona naokita. Nali haiyaharenæ iraiti hawarehare kakoa aotyakijita. Maika hirae ekakoaha hoka halakisaha haxaotyakiraha hatyohare kakoa.

⁴ Maika hirae ihiyeha hoka hatyo xakaihakeretere tahi, toahiyereharenae nexare xoaha tahi kaexaretyahitereha halakisaha. Hatyoharenæ hiyeta halitinae iraihekoatyahitataha. Nikare tyaonahitaha hoka maisa atyo Enore xahekola tyakekoti hiyeta waiyekehalakitere akereta xini.

⁵ Exe xaotyakisati atyo aeroretya maheta xawaiyityati waiyexete mahiyaseti akota tyoitere, tyakoiyahaliti waiyexeta tyoitere, tyakekoti aliterexeta tyoitere.

*Maika Xirihare Xaotyakisatiyena Metalahare
Kakoa
(Romanos 16.17-18; 1 Timóteo 4.1-3; 2 Pedro 2.1-19)*

6 Haiyaharenae halakisa exeharenae hoka maisa xoare tyomare, iraehekoatyahitataha.

7 Kasani Enore Xaotyakiraho kakoa xakore aotyakisa aokowitaha hoka maisa waiyorexeha, maisa waiyekehalkere enomanaha, exahe iraetereha hatyakekoneha kakoa hoka maisa waiyekehalkere enomanaha.

8 Xaotyakiyaho atyo waiye, aokitere akeretaiya atyo kaomaka hoka ehekore. Hatyohare waiyekehalkita womana.

9 Xaotyakiyaho atyo maisa haliti waiyexenae anere xini. Xalijiniharexenai, iniyalahare nomaseharenae, masemaxemalaharenae, Enore maniya mawenaneharenae, maxaiminiraharenae, matyakekoneharenae anere atyo. Aijitere hanexe, hanityo, haliti faharenae anere tehtiya.

10 Exahe hoka ohiroarexenae, enatyalolonae, haenane hatya kakoa ohiro akere tyaoniterenae anere. Maoseratyaliyena, iraesetatere harenae anere. Kirakahare betetyaka akere kolatyaha haliti hoka betetitere harenae anere. Emetalahare xakaitere, xoaliniharetere iniyalahare tyomahitere hoka Enore niraene mahokoanetitereharenae anere tehtiya atyo kaomaka.

11 Exe xaotyakisati atyo Iraiti Waiyexe isa nomani Enore hoka noxakai aohenere. Enore kinaterexe waiyexe nalitare.

Ihalahaliti Enore Xairakoaneharera Hiyeta

12 Nihalahare Wiyekohase Jesus Cristo kakoa. Iyateliti isa nomani hoka notyomehenere nohateni hiyeta, exahe hoka tyakeko natyo hoka aoka natyo hoka nohateni notyomehenere hiyeta.

13 Nikare tyoma, toahiya xakore iniyalahare niraeta etahi, iniyalahare namokitene xoaha hoka. Nokirawanetene harenae xakore hoka Enore airakoaneharetya natyo. Maisa notyakekorene hoka hatyo hiyeta maisa waiyekehalkere nomani notyomitereharenae.

14 Xakore hoka Wiyekohase kalore hawaiyehare hiyeta, tyakekoti, xawaiyetyati isa nomani Jesus Cristo koamaniya nawenatyaka hiyeta.

15 Exe xaotyakiye atyo aliterexe, hoka maika katyakekotyaka, kaxaokaka waiyexe xahekore kakoa: Jesus Cristo tyoa halitinae koni hoka iniyalahare nomaseharenae waiyexe maniya moheta maheta. Natyo ene atyo masakare iniyalahare nomasehare,

16 xakore hoka hatyo hiyeta Enore airakoaneharetya natyo, Jesus Cristo hamaholawakene nokakoi hotikisa maheta. Exehare atyo ite jikiniti tyakekohenerena waiyehena hoka ihiyeta tyakekohena hoka wenati matyotenehare ite enawenaneha tyaona.

17 Maika Xekohaseti matyotenehare, makamanehare, mawaiyakahare, haterore Enore kaxaiminisaka, exahe hoka kaihalaharetyaketa mene ekakoa naoka xoaha.

18 Naokitere akereta hisaona naoka, haré Timóteo. Koxaka atyo toahiyita nikare kairaetyaka hitahi. Maika exe iraiti kakoa haiyateretyoa Xekohaseti koamaniya.

¹⁹ Maika heko hityakeko, waiye maniya taita hahekotya. Haiyaharenae atyo maisa haxahecola waiyexe xema tyaonare hoka hatyo hiyeta ityakekoneha mawenekoareta.

²⁰ Enekoniha Himeneu, Alexandre xoaha. Ahalakoahaliti niyatere ana nahalakisahene, kaxaotyakisaka hoka maisa Enore tahi iniyalahare iraehenahititaha maheta.

2

Xaotyakisati Iraexatyati Tahi

¹ Exakere hotohare: Maika iraexatyati, xaxati harenae kaomaka ihalahaliti Enore kakoa, tyotya halitinae tahi.

² Maika kalorexenae xekohasetinae tahi xiraexatyia hoka waiyoreha maheta hoka waiye, wimehexaiko wisaona. Hoka tyotya xoalini hare Enore aokitere akere waiyexe taita wisoma.

³ Hatyo harenae atyo waiye. Enore waiyexe maniya mohetehenere wiso ana atyo hatyo harenae waiyeta.

⁴ Kasani tyotyaha iniyalahare nonitata kaiyakehetaha hoka waiyexe maniya kaxomokahetaha hoka waiyexe, aliterexe waiyekhalaka enomanaha aokita.

⁵ Hiyaiya, haterore atyo Enore. Haterore haliti hoka Enore koamaniya mokita halitinae. Hatyo haliti atyo Cristo Jesus.

⁶ Hatyota isoawi waini maheta hoka tyotya halitinae waiyexe maniya moheta maheta. Enore xaimenekola aoseta kaxekaka, hotikisa maheta Enore xahekola. Kasani tyotyaha waiyexe maniya tyaohetaha aokita hoka.

⁷ Nokaxaxikatyaki iraiti kakoare hoka majudeuneharenae naotyakisa, hoka Iraiti Waiyexe, tyakekoti aliterexe hoka noxakai maheta. Maisa namaoseraita xini, aliterexe niraeta.

⁸ Hiyeta hoka exakere kaomaka naoka: Maika wenakalati nihatyaka tyaoniterenae iraexahenaha Enore hiye hoka hakanonaeha ainakisaha iniyalahare hamaomaneharetaha, exahe hoka hamaxalijinharenetaha.

⁹ Maika ohironae tehitiya irihalo tyaona hoka waiye hamaxaokowihalotyoane kakoa kaimatyoaha hoka waiye ahekotyaha hawenaneha kakoa. Exahe hoka maisa masakare waiye tilikoaha harenae, maisa xoare maheta mokahitaha netati, pérola, ouro, exahe hoka imiti masakare karore ako hoka isoahitaha.

¹⁰ Waiyexe taitaiya tyomaha hoka katyakekotyakaha, aliterexe waiyexe xema tyaonahitaha nerekati maheta.

¹¹ Maika ohironae mema tyaonaha haxaiminiraha kakoa.

¹² Kasani ohironae maisa enanae aotyakisa, wakatya hare naokare. Maika mema tyaonaha.

¹³ Hiyaiya, Adão hotohare kaomaka, hatyo na-jikinita Eva kaomaka.

¹⁴ Maisa Adão xini kamaoseratyaka. Hoka ohiro atyo kamaoseratyaka hoka maisa Enore aokitere akereta tyaonita.

¹⁵ Xakore hoka ohiro ite xoima kaisanihena hoka iniyalahare nonita kaiyakeheta, hekoiya tyakeko, waiyexe maniya taita tyaonita, irihalo tyaonita, awaiyetita haiyanae hare hoka.

3

*Tyakekohatiyena Kaxaikotyasesnae
(Tito 1.5-9)*

¹ Exe xaotyakiye aliterexe: Xala xamani tyakekohatiyena kaxaikotyase tyaona aokowita hoka haka aokowi waiyexe hateniti.

² Maika exakerexe tyakekohatiyena kaxaikotyase: haliti iniyalahare maomanehare waiyexe, hatita yanityore, maxaokowiharetyoanehare, waiye kaxaikoawitere, waiyore aotyakijitere, maxeharenahare, haliti kaokehena hoka waiye mokiterehare.

³ Kawexere maeranehare, maxalijiniharenehare, waiye iraeterahare, mehexaiko tyaonitere, xiye haliti kalore haomana maxaokalahare, olo kalore maxaokalahare.

⁴ Waiye haisani, haiyanityo xoaha kakoa tyaonitere, exahe hoka ityaninae tyakekotene haxaiminiraha kakoa.

⁵ Hiyaiya, xala xamaniya maisa haiyanityo, haisani hekoti waiyore kaxaikore, hoka aliyakereya tyakekohatiyena kaxaikohena?

⁶ Waitare Cristo koamaniya tyaohenereya maisa aliyakere tyakekohatiyena kaxaikotyase tyaonita. Waiya aokowiharetyoa hoka Tihanare akereta kamatyakekotyaka.

⁷ Exahe hoka matyakekoneharenae aiminisene, waiya aliya hoka kamatyakekotyaka hoka kairae haretyaka hoka Tihanare maoserala xema tyaona.

Tyakekohatiyena Kahinaetyasesnae

8 Nikare tehitiya tyakekohatiyenaе kahinaetyaseharenae hoka waiye, mamaoser-alahareha. Maisa kaloxa vinhoxa terahitaha, exahe hoka xiyealiti, olo hare maisa kahare aokahitaha haomanaha.

9 Hekoiya waiye ahekotyaha, exahe hatyakekoneha xema taita tyaonaha.

10 Maika kahasakaharetyakaha hotohare. Hatyo kakoaiya jiyaha hoka tyakekohatiyenaе kahinaetyase tyaonaha.

*Ohironai Nawenane Waiyexe
(Tito 2.3-5; 1 Pedro 3.1-6)*

11 Tyakekohatiyenaе kahinaetyase exanityo tehitiyaiya waiyexehalo, maisa iraesexe. Maxaokowihalotyoanehalo, waiyexehaloiya tyotya xoalini hare hiye.

12 Tyakekohatiyenaе kahinaetyasehareya atyo hatita yanityore, waiye kaxaiko haisaninae, haiyanityo hare.

13 Hatyohare hahatene waiye tyomahitere-harenae atyo katyakekotyakita hoka waiyore mamairanehare irae ahitaha Jesus Cristo hatyakekoneha tahi.

Kalore Metaharexe

14 Exeharenae naxairaita homana, hoka kasani haxeroreta notyoa nowaiyeheta hiso naokowita.

15 Nohowitihareya hoka exe babera hiyeta waiyekehalaка homana Enore hanako wawenane tahi. (Tyakekohatiyenaе xaokaka Enore hana nita.) Hatyo atyo Enore makamanehare hana. Tyakekohatiyenaе atyo aiyatelikijita Iraiti Waiyexe.

16 Alitere atyo Enore xaotyakiraho maisa mawitihare xini:
 Kaotyaka haliti akereta, Enore Nisekohare atyo haliti waiyexe aokene. Anjonae hoka waiyene. Kaxakaisaka etahi haliti hotyali-nae koni hoka kahare tyakekoahene. Exahe hoka kakolatyaka enokoa xeta.

4

Xaotyakisatiye Metalaharenae

(1 Timóteo 1.6-7; 2 Pedro 2.1-19; Judas 4-19)

1 Enore Nisekohare waiyekehalaka irae: Miyanitiye xowakehena ite hoka haiyaharenae halakisa hatyakekone. Hoka isekohaliti maoseratyaliyenaе ite tyakekohenaha, exahe ite Tihanare xaotyakira hoka tyakekohenaha.

2 Exe xaotyakiye atyo matyakekoneharenae, maoseratyaliyenaе ta tyoita. Exahekolaha atyo ekamane akereta. Motya kamatiherahi watyahiro keralihenahenene hoka maisa kehexene akereta atyo.

3 Exe halitinae atyo aotyakisahitaha hoka mahokoanetyahitaha wenakakoati, exahe haiyaharenae nakairati manakairatyakene aokahitaha. Xakore hoka Enore atyo exe kakanakairatyakere tyoma kakanakairatyaka maheta tyakekoterenenaе, iraiti waiyexe xema tyaponiterenenaе hiyeta. Maika xikanakairehenere nahitita xiraexatya xihalaharene kakoa.

4 Hiyaiya, tyotya Enore tyomehenerenaе atyo waiyexe taita. Hiyeta hoka maisaiya aliyakere maxawaiyetyakita. Maika iraexatyati ihalahalin-iti kakoa kaxaokaka tyotya hatyoharenae.

⁵ Hiyaiya, Enore niraene, iraexatyati xoaha hiyeta tyotya hatyoharenae waiye kaokita Enore aria.

Waiyexe Jesus Cristo Wakanehare

⁶ Exe kakoaiya haotyakisa wihinaeharenae tyakekohatiyenae hoka Jesus Cristo wakanehare waiyexe hisaona, haotyakisahene iraiti waiyexe, tyakekoti xema hisaonitere kakoa hoka.

⁷ Awa atyo haiyaharenae xakaihakatyahitatere ewaxirahare, hatyaharettere xema hisaona. Cristo koamaniya hawenane kakoa haiyateretyoa hoka kekoare. Heko hahasakoawi Cristo koamaniya hawenane kakoa.

⁸ Haiyanae hasakoawiti atyo alitere waiye xakore hoka Enore koamaniya hasakoawisaka atyo masakere waiye. Hatyo hiyeta atyo wenati waiyexe kaotyakita, kalikini exahe haxowaka hoka.

⁹ Exe xaotyakiye atyo aliterexe, maika katyakekotyaka, exahe kaxaokaka ihalahaliniti kakoa.

¹⁰ Hiyeta hoka waiyateretyoa, wahakita kahare. Enore xahita watyahita. Hatyo atyo makamanehare, tyotya halitinae niyasehareheta, tyakekohenerenae masakare waiyexe maniya xomokasehareheta xoaha.

Xoimahalitinae Nawenane Waiyexe

(1 Timóteo 6.11-12; 2 Timóteo 2.22-26; Tito 2.6-8)

¹¹ Exeharenae kakoa haotyakisa, hiyakai xoaha. “Exe hare xema xisaona”, hexa ihiyeha.

¹² Awa atyo haiyanae matyakekohena hiso, hiyomahalitini hiyeta. Xakore hoka maika hawenane waiyexe hahotikisa tyakekohatiyenae ana:

iraiti, xawaiyetyati, tyakekoti, waiyexe wenati hiyeta.

¹³ Maika nokaokini kijiya hakaexaretya halitinae haotita Iraiti Waiyexe nanekoa kaxairatyakehenere hoka hiyakaihakaty Cristo koamaniya nawenatyaka akiti, exahe Cristo xaotyakira kakoa haotyakisa.

¹⁴ Awa himaotyane toahiya xowaka tyakekohatiyena kaxaikotyenasenae mokaha hakaheha hiseri heno hoka iraexatya hitahi hoka iyateliti Enore isa homana hoka Xekohaseti ana hahaka maheta.

¹⁵ Maika hahekotya exeharenae hiye hoka hatyo xema maniya taita hisaohena hoka hawénane waiyexe kekoarene tyotya halitinae waiya.

¹⁶ Hirihare hawénane kakoa exahe hiyaotyakira kakoa hoka. Heko nikare hisoma, nikareya hoka waiyexe maniya hamokoawi, exahe semiterenae hoka waiyexe maniya hamoka.

5

Tyakekoterenae Xaiminisaka

¹ Awa atyo inityohaliti hiwatyalihena hoka kinatyaxa hiraehena ekakoa. Hiraehena ekakoa hoka hexe kakoa hiraetere akereta hirae ekakoa. Nikare hiwatyalihena xoimahalitinae hoka haxenane, hiximarene kakoa hiraetere akereta hirae ekakoaha.

² Inityohalotinae kakoa hiraehena hoka hityo kakoa hiraetere akereta hirae. Xoimahalotinae kakoa hiraehena hoka hahahalonae kakoa hiraetere akereta hirae, awa atyo iniyalahare hahekotya ekakoaha.

3 Wainiyaneneronae mahinaehalohalonae hoka hakahinaetyahene.

4 Xakore hoka wainiyaneneronaiya atyo kaisaniye, kajiyetexe hoka hatyonaiya atyo kahinaetene. Irihareya kahinaetyahitaha hanityo, hasero xoaha hoka ehekoreya. Nikareya hoka bakahenahitaha hanexenaeha, hanityonaeha, hatyokoenaeha aenaehenaherene katyahe. Enore atyo awaiyetita hatyoharenae.

5 Wainiyaneneroiya hawawahalo kaiserehare tyaonitere atyo, maisa xala hare kahinaetyare hoka Enore kahinaerene atyahita, hoka iraexaita ferakoa, makiya xoaha Enore kahinaetene mahaeta.

6 Xakore hoka wainiyaneneroiya hakéhalahalone maniya taita tyaona hoka ekamane atyo tyaonita, kasetra xakore hoka.

7 Timóteo, maika noxaotyakiri akereta hirae ihiyeha hoka waiyexe maniya taita tyaonaha hoka maisa xoare kaxawatyakita ehenoaha.

8 Hoka xala xamaniya maisa hahinaehare kahinaetita, exahe hanityo, hanexe hoka hatyo atyo matyakekoneta. Hatya matyakekonehare nawennane xahexe atyo tyaonita.

9 Maika wainiyaneneronae nexalo kaxomokakiterko 60 wanonexe xahexenae nexalo, exahe hakirore kaiyanenehenolo nexalo taita kaxomokaka.

10 Xoalini hare waiyexe ohiro nómame kawaiyakitere, haisaninae waiye aenaehenere, Enore koamaniya tyaoniterenae kiji tihitere, hatya kaokehena hoka hahanako waiye mokitere, haiyanae ana xoalini hare howitiharetere

hiye kahinaetitere, exahe tyotya xoalini hare waiyexe taita tyomitalohalo nexalo taita atyoite kaxomokaka baberane koa.

¹¹ Hoka awa atyo wainiyaneneronae xoimahalotiterenae nexalo hamoka. Hiyaiya, haxahekola hiyetaiya kaiyanene aokowihena hoka halakisa Cristo koamaniya nawenatyaka.

¹² Nikareya hoka maisa hetati iraeteroha akereta tyomahitaha hoka maisaiya ehekoreta.

¹³ Exe tehitiya: Tyaonakoatyahitaha, tonakoatyahitaha hatinae nihatyaka, maisa xoare hekoti tyomareha. Iraesahitaha, haiyanae nawenane watyalyahitaha. Mairaetyakahare mahetare ene irai ahitaha.

¹⁴ Hiyeta hoka kasani xoimahaloti wainiyaneneronae kaiyaneneheta, kaisaniheta hoka kaxaiko haisaninae, exahe hahanaha hare naowita. Nikareya hoka wahalakoaharenae maisa iniyalahare iraetaha witahi.

¹⁵ Hiyaiya, koxaka haiyahalonae wainiyaneneronae halakisaha hatyakekoneha Cristo hoka Ahalakoahaliti koamaniya tyaonaha.

¹⁶ Maika hatya tyakekohatiye hinaehalo wainiyanenero hoka kahinaetene. Awa atyo tyotya tyakekohatiyenae kahinaetyahene aoka, waiya aliya hoka howithihare enomanaha. Hawawahalonae tyaoniterenae atyo ite tyakekohatiyenae kahinaehena.

¹⁷ Tyakekohatiyenae kaxaikotyase waiye hakiterenae atyo waiye kabakatyakita. Iraiti Waiyexe xakaiterenae, aotyakijiterenae terota atyo waiye kabakatyakita.

¹⁸ Hiyaiya, exakerexe atyo nexa Iraiti Waiyexe:

“Awa atyo bowi kanase xolatya, tyahakita trigo kase hoka”.

Nihitiya:

Hatenitiye hakita hoka waiye bakatyaka.

¹⁹ Awa atyo kairaeharetyakehenae tyakeko-hatiyena kaxaikotyase hoka kasemaxematyaka. Hoka hinama, hanamaiya atyo irae hoka katyakekotyaka.

²⁰ Iniyalahare tyomehenerenae haotikatita hi-watyali hoka haiyanae tehitia mairaha hoka maisa nikare tyomahita.

²¹ Enore, Jesus Cristo, anjonae waiyexenae haotita heko niraeta: maika tyotya xoalini hare hisomehena hoka exe xaotyakisatinae hityakeko. Tyotya halitinae, exahe tyakekohatiyena kaxaikotyase, exahe hihinaeharetere hoka hakakoa hamokahene.

²² Awa atyo hikaholawaka hikahe hiyomokala kakoa hatya seri heno Enore hatene haka maheta. Awa atyo haiyaharenae tyomehena iniyalahare hoka hakahinaetene. Waiye hikaxaikoawi.

²³ Awa atyo one taita hisera, vinhoxa tehitia ininae hisera hoka hityako kawetere makaheheta. Hiyaiya, kahalikihena hihokakita.

²⁴ Haiyanae iniyalahare tyomehena hoka kawaiyakita rota, iniyalahare exomokakaha nahitita. Hoka haiyanae nómáne iniyalahare atyo maisa haxerore kawaiyakere.

²⁵ Nikare tehitia xoalini hare waiyexe kaomakehena hoka kawaiyakita rota. Exahe hoka haiyanae atyo komita maisa waiye kasemakita xakore hoka maisaiya aliyakere kaxateroakisakita.

6

*Xekohasetinae, Hatenityienae
(Efésios 6.5-9; Colossenses 3.22-4.1; Tito 2.9)*

¹ Wakaharenaaya waiye aiminisa haxekohase-naeha hoka maisa xala hare iniyalahare iraeta Enore tahi, exahe wiyaotyakira xoaha xaokaka hoka.

² Maika wakaharenae xekohase tyakeko-hatiyena tehitiya hoka aiminisa haxekohase. Hiayi, exekohasenai atyo Cristo koamaniya tyaoniterena hoka waiye hakitere resebitita hoka ixiyakawala ihinaeharenaeha atyo.

*Xaotyakisati Metalahare, Aliterexe Xiyehaliti
Xoaha*

Maika exeharenae kakoa haotyakisahene:

³ Hoka hatyaiya hawarehare xaotyakiye kakoa aotyakijita, hoka maisa atyo Wiyekohase Jesus Cristo niraene waiyexe tyakekore, exahe hoka maisa wiyaotyakira waiyexe akere xini aotyakijita hoka

⁴ hatyo haliti atyo ahinityare tyaonita, maisa xoare hare waiyorexe. Kinatyaxa irai aokowita halitinae kakoa xoalini hare tahi. Hatyohare hiyeta okoawahare kakoati, xalijini kakoati, maoseratya kakoati, matyakekone kakoati kaotyakita,

⁵ exahe iraesekakoati kahare. Nikare tyaoniterenai maisa waiye maniya ahekotyareha, maisa aliterexe xema tyaonareha. Exahekolahia hiye motya Iraiti Waiyexe hiyeta kalore kakaxiye-haretyakita, kakaoloxatyakita aokahitaha.

⁶ Alitere atyo Enore koamaniya nawenatyaka hiyeta masakare waiye maniya kaxomokakita, xoare xamaniya wixiyehare hoka wihalahare ekakoa hoka.

⁷ Hetati wisahenere xowaka xoare wakolatya? Maisa xoare! Wijikohenaite aliye wawenane hoka xoare wakolatya? Maisa xoare!

⁸ Hiyeta hoka wikanakairere, wikaimere hoka maika hatyo kakoa wihalahare.

⁹ Haiyaharenae kaoloxa, kaxiyehare tyona aokowita hoka hatyo hiyeta kahasakaharetyakahitaha, kamaosseratyakahitaha. Exahe maisa waiye ahekotyahitaha hoka hatyoharenae hiyeta xamaikohaliti, mawenekoaretyati kaotyakita enomanaha.

¹⁰ Hiyaiya, olo kaxawaiyetyakitere hiyeta atyo tyotya xoalini hare iniyalahare kaotyakita. Haiyanae xiyealiti harenae aokitere haomana hiyeta hatyakekone halakissa hoka xamaikohaliti kalore kaoka enomanaha.

Xairihalinikisati

(1 Timóteo 4.11-16; 2 Timóteo 2.22-26; Tito 2.6-8)

¹¹ Hoka hiso Enore koamaniya hisaonitere, maika hisekoahena hatyoharenae nonitata. Waiyexe maniya, mamaoseralahare maniya taita hisaona. Enore maniya taita hisaona. Exahe tyakekoti, xawaiyityati, maxahenerahareti xema taita hisaona. Heko hisaona mene Xekohaseti koamaniya.

¹² Maika waiye haiyateretyoa hityakekone kakoa hoka wenati matyotenehare ana hahikoa. Hatyohare ana atyo Enore aoka hiso kahare

halitinae haoti hityakekone hahotikihenere xowaka.

¹³ Kalikini Enore haotita, exahe Jesus Cristo haotita nawakaty a hiso. Hiyaiya, Enore atyo wenati ijita tyotya halitinae ana. Jesus Cristo hoka waiye iraeta Pôncio Pilatos haotita. Exakere nawakaty a hiso:

¹⁴ Maika iraiti kaxekakehenere homana xema taita hisaona, Wiyekohase Jesus Cristo haikoa-haneheta kijiya.

¹⁵ Enaose ferakenehena ite hoka kaotyake-hena Enore xaokalita. Hatyo atyo kalorexenae Xekohase, xekohasetinae Xekohase. Hatyo atyo haterore kalorexe waiyexe.

¹⁶ Hatyo taita atyo makamanehare. Xaokanatyakalati tyaonitere nali atyo tyaonita, maisaiya xala hare xane kaokita ehaliya. Maisa xala hare waiyarene, maisaiya xala hare waiyitene. Maika kaxaiminisaka, kaihalaharetyaka mene ekakoa! Xoaha.

¹⁷ Maika kaoloxerena hiae hirae hoka awa aokowiharetyoahenaha haoloxaha ali waikohekao tyaonitere kakoa. Exahe hoka hatyo xema hawenane mokaha. Hiyaiya, hatyoharenae atyo maisa wikinatere mokare. Maika Enore xahita kaisere atyahaha. Hiyaiya, hatyo atyo tyotya xoalini hare waiyexe ijita womana wihalaharene niyahare.

¹⁸ Hirae ekakoaha waiyexe tyomaha maheta hoka ihiyeta kahare xoalini hare kakoare waiyexe tyaonaha waiyexe tyomahitere ihyeta. Maika waiyexe haliti tyaonaha hoka haxiye hareha ihyeta maxiye hareharenae ana isaha.

19 Nikareya tyaonaha hoka enahetaha maniya atyo kahare xoalini hare waiyexe kaxomokakita. Nikareya tyaonaha hoka waiyexe wenati ana xane hikoaha.

20 Timóteo, maika waiye hikaxaiko kaxekake-henere homana. Awa atyo hiraesekoatya, hatyoharenæ atyo maisa waiyexe Enore ana. Exahe awa atyo haiyanae kakoa hiraesekoatya waiyoliniti aakahitere tahi. Hatyoharenæ atyo ehaikoare.

21 Haiyanae waiyoliniti aakahitere kakoare aokowiyahitaha, hoka ihiyeta hatyakekoneha halakisa.

Maika Enore waiye kaxaiko xiso xityotya, eko xoaha.

Waitare Wenati Aho New Testament in Parecís (BR:pab:Parecís)

copyright © 2012 Wycliffe Bible Translators, Inc.

Language: Parecís

Translation by: Wycliffe Bible Translators, Inc.

Parecís [pab], Brazil

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Parecís

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
6c7be6d9-c7f4-528f-bc3f-f1e6ef0d9943